

1 FITA

Fita yana kiluma nagami.

Leta de'e Fita i kilumi i nago tovetumagananidi i miave'eve'e'elagiga 'waidie. Tovetumagananidi 'awalawa fuedi 'waidie i miamiani bani'odi wakawaka. (1 Fita 1:1) Tutuyanina Fita i miamia Loma, 'atamananina tamu 'ana wagava Babiloni, de'e letanina i kilumi.

Tovetumaganavo vita tulina tulina i veveluagadi Loma gabemani 'waidiega fai Iesu Keliso i vetutuyameni. Fita nuanuana i na kiavetoketokedi bega ma yadi sosoana i na tokemaigedi i na tovotovoi fa'alina. Wata Fita i tolinuatal'i 'waidie 'adi 'ita'ita'i faifaina, Iesu yana tokemaiga vita tulina tulina 'waidie faifaina wata yana vila-vaitugana faifaina bega i na nuanuanidi nika i na vetoketoke. Wata mageta 'ana sauluva Iesu Keliso 'ana tovetumaganavo 'adi laubwaina faifaina wata i veifufu. De'e letanina 'ana 'idi side bani'odi.

Vona-vekaiwa. 1:1-2

Tolinuata'i bega i na 'asetai Yaubada yana 'ita'ita'i. 1:3-12

Mageta 'ana sauluva faifaina i veifufu. 1:13-2:10

Tovetumaganavo yadi vematahayakayaka faifaina. 2:11-3:7

Vita ta na veluagadi Keliso 'ana vetutuyama faifaina. 3:8-4:19

Veifufu tulina tulina tovetumaganavo faifaidi. 5:1-11

Yana 'alanuai 'ifwaidi. 5:12-14

1 ^a Yau Fita, Iesu Keliso 'ana tomata'aulele a vekaiwa 'omi tomotoganimi Yaubada i venua'ivinemiga 'waimie. 'Omi 'wa dega Iesu 'ana tovedumwe'ai'ai 'waidiega 'wa veyavuyavula mali 'awalawa 'waidie. Side 'awalawanidi 'waidie, Fonito, Galetia, Kafadosia, Eisia wata Batinia. ^{2a}Basenadiotoga Yaubada Tamada i 'asetami i venua'ivinem i nuanuana 'omi yana tomotoga, wata 'Anu'anununa 'Atumaina 'wainega yami sauluva matatabuna i tonova mataneye. Wata Yaubada i venua'ivinem Iesu Keliso 'wa na vematakeyakeni, taunina dayaginega yami sakona i iwalekolekoadi bega 'atumai'avami Yaubada mataneye.

^a 1:2 2 Tes 2:13; Efe 1:4; Ibu 12:24

A vevelu'ui faifaimi nuanuaku Yaubada ma yana nuakalikali i na vevesauluva 'atumaiotogina 'waimie wata nuanua bikana i na velevelemi wata yami mia i na ve'atumaiotoga.

Iesu Keliso 'waineye vetumagana-vagata.

^{3 b}Ma yada vekaiwa Yaubada ta na subiai, taunina Iesu Keliso 'ada Toveimea Tamana. Fai i 'isanuakalikalieda bwaikina mia 'ivauna wata 'atumaina ta veluagai Iesu Keliso yana tovi-vaitugana 'wainega, bega 'asiau ta vetumagana ta nuani mogitana mia 'atumaina wata miamia-vagaina ta na veluagai. ⁴Mianina wata 'ai'aiwabu taiadi, faifaidi basenadi Tamada i vona'awaufaufa 'awaie i na veleda, abame i 'i'isave'avinidi bega kebu i na 'anikudadi, 'alo i na sako, 'alo i na 'watu. ^{5 c}Omi yami vetumagana 'wa yato-vagasedi Yaubada 'waineye bega yana toketokena 'wainega i 'ilbababalemi i na nagoga tutuya 'ana 'eba ve'a'ava 'waineye yana 'ita'ita'i nonogina 'wa na veluagai 'ai'aiwabunidi taiadi.

^{6 d}'Asiau vita tulina tulina 'wa veveluagadi Iesu 'ana tovedumwe'ai'ai 'waidiega bega 'wa nunuavita, siwe kebu i na 'eno-vagata. We'e 'wa na nuani naninidi 'atumaidi 'awaie 'wa na veluagadi Yaubada 'wainega begaidi 'wa na sososoanamo. ⁷Yaubada vitanidi i tauyedi i sousouyedi 'waimie nuanuana i na 'asetai yami vetumagana toketokena 'alo kebu. 'Ai'edi tomotoga golida i na alai fwayafwayayega, nagami i na vetagovi golida i na 'awakoluya we'e yogo i na koiyavulen i bega i na 'asetai golida 'aisena i 'eno'eno 'atumai'avana, 'ana tutula bwaikina. Wata yada vetumagana bani'odi. Golida 'a'a'avina, nani siaina Yaubada mataneye, we'e yami vetumagana nani bwaikina 'waineye nuanuana i na sisitonovimi vita 'waidiega i na 'isemi yami vetumagana 'atumaina wata toketokena. 'Ai'edi yami vetumagana fa'alina vitanidi 'waidie, 'aitanina Iesu Keliso i na souyen, subia, 'ai'aiwabu wata ve'ililibu 'wa na veluagadi Yaubada 'wainega. ^{8 e}Kebu tamu tutuya Kelisonina 'wa da 'iseniga, siwe 'wa nunuakalikalieni. 'Asiau wata kebu 'wa da 'ise'iseniga siwe ma yami vetumagana taunimi 'wa tauyemi 'waineye, begaidi yami sosoana bwaikaotogina kebu ta na vona. ⁹Yami sosoananina, sosoana mogitana fai 'ita'ita'i 'wa veveluagai Yaubada 'wainega, kumanina faifaina 'wa vetumagana.

Basenadiotoga Yaubada yana tolu'ivonavo i vona-vagata 'ada 'ita'ita'i faifaina.

^{10 f}'Ita'ita'inina faifaina basenadiotoga Yaubada yana tolu'ivonavo i lauala-'atumai wata i velutolitoli nuanuadi i na 'asetai. Yadi 'aseta sai'af'o siwe i lu'ivona i vona-vagata 'ita'ita'i Yaubada i na velemi 'ami nuakalikali.

^b 1:3-4 1 Fit 1:23; Kol 1:12 ^c 1:5 Kol 3:3-4; Fol 20:32; Ion 6:28 ^d 1:6-7 Ibu 12:11;
1 Fit 5:10; Iob 23:10; Iem 1:3 ^e 1:8 Ion 20:29 ^f 1:10 Ais 53:1-12

¹¹^gKeliso 'Anu'anununa i agedi i vonedi i vo, 'Awaie Keliso vita fuedi bwaikidi i na veluagadi we'e yana tovi-vaitugana 'waineye 'ai'aiwabu magemagetadi i na veluagadi abame." 'Ida ta 'asetadi naninidi i souyedi yada tutuye, we'e basenadiotoga tolu'ivonanidi igodi nuanuadi i na 'asetadi ava'ai tutuyaga, wata naninidi bani'odi i na munega i na souyedi. ¹²^hWata Yaubada i vonedi i vo, 'Wa vetolu'ivonaga kebu taunimi 'ami 'aivaita faifaina, mali tomotoga faifaidi bola kebu i da tubuga." Vona mogitana naninidi 'akonadi i souyedi yada tutuye, Iesu Valana 'Atumaina 'wainega 'wa nogai tolau'age 'waidiega. Yaubada 'Anu'anunu 'Atumaina i vetunei abamega tolau'agenidi i agedi bega yana toketokena 'wainega Valana 'Atumaina i lu'ivoneyedi 'waimie. We'e Yaubada yana anelose, avinodi taiadi i miamia siwe igodi nuanuadi i da 'asetai 'ada 'ita'ita'i Iesu 'wainega.

Yaubada nuanuana yada sauluva tonovidi.

¹³ⁱOmi 'akonadi Iesu Valana 'Atumaina 'wa 'asetai, begaidi i lubwainemi yami nuanua 'wa na 'idewadi, taunimi yami sauluva 'wa na 'i'isave'avinidi wata yami vetumagana 'wa na yato-vagasedi 'ami nuakalikali 'waineye, nuakalikalinina Yaubada i na velemi Iesu Keliso yana souyagi 'waineye. ¹⁴^jBasenadi Yaubada yana Vona kebu 'wa da 'asetadiga, bavubavumi nuanuami sakona-vebogi. We'e 'asiau 'akonadi 'wa 'aseta bega i lubwainemi Yaubada 'wa na vematayakeyakeni wata nuanuananidi sakoidi kebu i na veveimeyemiga. ¹⁵^kI lubwainemi yami sauluva matatabuna tonovidi fai Yaubada, kumanina i venua'ivinemiga, yana sauluva matatabuna tonovidi. ¹⁶^lWata Yaubada yana Buki nageneye i vo, Yau magemagetaku kebu tamu yaku sakonaga, begaidi 'omi wata bani'odi i lubwainemi yami sauluva magemagetadi.

¹⁷^mTutuyanina 'wa vevelu'ui Yaubada 'waineye 'wa aware-Tamama, siwe Yaubadanina yana nuanua 'aitamogana 'wainega tomotoga matatabuda i na veimeyedea vonayavuga 'ana tutuye. 'Awaie yada sauluva 'adi tutula ta na 'ewadi, 'atumaidi, wata 'atumaidi we'e sakoidi, wata sakoidi, begaidi tutuyanina ta na miamia fwayefwayeye i lubwaineda ma yada kololo Yaubada ta na veve'ililibuyeni.

Keliso i tuveobuda.

¹⁸⁻¹⁹ⁿBasenadi tubumiavo yadi sauluva kebu 'atumaidiga, yadi vetumagana i yatodi nani-'avo'avovo 'waidie, 'omi 'wa saladi bega Seitani i yogonimi sauluvanidi 'waidiega. We'e 'akonadi 'wa 'asetai Yaubada i tuveobumi. Bega i tuveobumiga kebu nani 'a'a'avid 'waidiega bani'odi

^g 1:11 Luk 24:26-27 ^h 1:12 Mad 13:16-17; Efe 3:10 ⁱ 1:13 Lom 12:2 ^j 1:14 Lom 6:19;

Efe 4:17-18 ^k 1:15 2 Kol 6:16-18, 7:1 ^l 1:16 Vei 19:2 ^m 1:17 VeL 10:17

ⁿ 1:18-19 1 Kol 6:20; Ion 1:29

mwali, nau'unu, bawe, 'alo mani, i tuveobumiga nani 'atumaiotogina, Keliso dayaginega. Taunina 'atumaiotogina wata magemagetana, yawaina i tauyeni faifaimi, tutulimi. Yana wafanina bani'odi me Diu sifi natudi i nikenikedi i vevelomuyedi Yaubada 'waineye yadi sakona 'adi 'u'uma faifaidi. ²⁰Basenadiotoga Yaubada bola fwayafwaya kebu i da 'idewaiga, nagami Kelisonina i venua'ivineni yana wafa faifaina, we'e tutuya de'e bega i na nagoga 'ana 'eba ve'a'ava 'waineye i sivemageseni faifaimi. ²¹Keliso 'wainega 'wa vetumagana Yaubada 'waineye, kumanina 'ana tosivetovoi wata yana 'ai'aiwabu 'ana to'anivelena, bega 'asiau yami vetumagana 'wa yato-vagasedi 'wa nuani mogitana 'awaie 'ita'ita'i 'wa na veluagai Yaubada 'wainega.

²² ^oAkonadi Yaubada yana nuanua tonovidi 'wa vevematayakeyakedi bega 'wa ve'atumi mataneye wata emiavo tovetumagana 'wa nunuakalikaliedi mogitana, begaidi i lubwainemi 'wa na toke yami venuakalikalalinina i na vebwaika-'af'o'af'o. ²³^pYami nuakalikalalinina i na vebwaikaga fai 'akonadi 'wa tubuve'ivau, Yaubada yana Vona miamia-vagaina 'wainega, vonanina mia 'ivauna wata 'atumaina lamudi, Basenadi inamiavo wata tamamiavo i venatunemi siwe 'awaie i na wafa, we'e 'asiau yana Vonanina miamia-vagaina 'wainega 'wa tubuve'ivau. ²⁴⁻²⁵ ^qAva'ai basenadiotoga i kilumi Yaubada yana Buki nageneye vonanina i voneyeniga, mogitana. I vo,

Tomotoga matatabudi bani'odi mosomoso,

We'e yadi 'ai'aiwabu wata 'adi subia bani'odi welavi ididi.

Mosomosonidi i 'a'lawagi'adi wata ididi i avuavuta.

Vona mogitana tomotoga matatabuda ta na ve'alawafawafa we'e 'Auvea yana Vona i na 'eno-vagata kebu i na 'a'avaga."

'Auvea yana Vonanina taunina Iesu Valana 'Atumaina, kumanina 'waimie i wai.

'Ida Keliso yana 'Aila'a.

2 ¹^rOmi Yaubada natunavo begaidi i lubwainemi sauluva sakoidi matatabudi 'wa na bailaotogedi. Kebu 'wa na vekaliga, 'ai'edi tamu sauluva 'wa na tatalabodeniga kebu wata 'wa na 'idewaiga, kebu 'wa na ve'unumagigi wata kebu 'wa na vebonaivo. ²Nuanaku kwakwama mwedamwedalidi tamu yadi sauluva 'wa na vetutuyameni. Tutuya fuedi yadi nuanua bwaikina susu, faifaina i 'we'we'wela. 'Omi Yaubada yana Vona nuami i da 'ewai. I lubwainemi tutuya fuedi 'wa na lulu'iawawa, faifaina 'wa na nuanua wata 'wa na vevenua'ivina, 'waimie bani'odi susu bega 'wa na vetoketoke i na nagoga mulieta 'ita'ita'i 'wa na veluagai.

^o 1:22 Ion 13:34 ^p 1:23 Ion 1:13; 1 Fit 1:3 ^q 1:24-25 Ais 40:6-8 ^r 2:1 Efe 4:22; Iem 1:21

³Vona mogitana, 'akonadi yada 'Auvea yana nuakalikali 'waimie 'wa lutonovi.

⁴⁻⁵^sKeliso taunina tamu folova miamia-vagaina, 'wainega Yaubada yana vanuga 'eba velu'ui i 'l'idewai. Tomotoga folovanina i 'iseni i baileni i vo, Nani-'avo'avovo," siwe Yaubada i venua'ivineni i silakai, 'atumaiotogina mataneye. 'Omi wata bani'odi folova ma yawaimi, 'wa na vaganago 'ada Toveimeanina 'waineye, taunimi 'wa na tauyemi 'waineye bega 'omi yana 'aila'a mogitana, 'wa da vo 'omi folova Yaubada yana vanuga 'eba velu'ui nageneye. Bei 'wa na vetofolova faifaina, 'omi bani'odi tovelomu yadi sauluva tonovidi, Iesu Keliso yana 'aivaita 'wainega 'wa na vevesauluva 'atumainina, 'asa'aiana yami 'anivelena Yaubada 'waineye, yana nuanua bani'odi. ⁶^t"Basenadiotoga Yaubada yana Buki nageneye side bani'odi Aisea i kiluma Iesu faifaina i vo,

Tamu folova, yaku nuanua bwaikina a venua'ivineni,

'Asiau a sisivetovoia yaku 'atamana Saioni 'waineye a na ve'unututuyeni.

Egavo yaku venua'ivinanina 'waineye yadi vetumaganina i na yato-vagasedi, kebu a na vedumwe'ai'ainediga, 'aivaita i na veluagai."

⁷^u"Omi Iesu 'wa vetumaganeniga, 'waimie folovanina nani 'atumaiotogina, we'e egavo i bailaga, taunidi bani'odi to'aiyogona sakoidi.

Folova tamu i baileni igodi i vo, Nani-'avo'avovo, ta na taweni."

Siwe mulieta folovanina folova kumekumetana, taunina 'unututu."

⁸^v"Wata tamu vona i kilumi Iesu faifaina Yaubada yana Buki 'waineye i vo,

Kileu de'e tomotoga i na tayaidi,

Wata 'waineye i na be'u."

'Waineye i na be'ube'uga fai Yaubada yana Vona kebu i da vematayakeyakedi, yadi vedumwe'ai'ainina basenadiotoga Yaubada i 'aseta-vagasesi bega i venua'ivinedi vematavuloga faifaina.

'Ida Yaubada yana tomotoga vevenua'ivinida.

⁹^wWe'e 'omi kebu bani'odiga. Yaubada taunina i venua'ivinem, yana 'aila'a. 'Omi Keliso taunina Kini yana tovelomu wata Yaubada yana tomotoga mogitana, yami sauluva tonovidi wata magemagetadi mataneye. I venua'ivinem dudubala 'wainega i miemi yana mageta 'atumaiotogina 'waineye bega ma yami subia 'wa na awa'ai'aia tomotoga matadie.

¹⁰^xNagami 'omi bani'odi nani-'avo'avovo, 'asiau Yaubada yana tomotoga mogitana. Wata nagami Yaubada yana 'isanuakalikali 'waimie 'wa bavuyeni, 'asiau yana 'isanuakalikalina 'wa veveluagai i 'ita'ita'iemi.

^s 2:4-5 1 Kol 3:11; Lom 12:1 ^t 2:6 Ais 28:16 ^u 2:7 Same 118:22 ^v 2:8 Ais 8:14

^w 2:9 Sou 19:5-6; Ais 9:2; Efe 5:8 ^x 2:10 Ose 1:10; Lom 9:25; 1 Fit 1:3

'Ida Yaubada yana tofolova-maimaiga.

11^yEkwavo 'ida wakawaka de'e fwayefwayeye, yada 'atamana mogitana abame, begaidi a vevelu'ase'asemi kebu taunimi 'wa na tauyemi bunu 'ana nuanua sakoidi 'waidie fai nuanuananidi 'anu'anunumi 'adi gaviavo nuanuadi i na vetoketoke 'waimie. 12^zI lubwainemi yami sauluva i na ve'atumai tomotoganidi kebu i da vetumaganaga Yaubada 'waineye matadie, bega tutuyanina i na awavesakoyemiga yami folova 'atumaidi i na 'isedi nika Yaubada i na subiai yana souyagi 'ana tutuya 'waineye.

13-14^aOmi 'Auvea yana tomotoga begaidi toveimea tulina tulina fwayafwaya de'e 'waineye yadi veimea 'wa na vevematayakeyakedi. Yami toveimea gabemani bwaikaotogina yana toveimeavo taiadi 'wa na veve'ililibuyedi, kumanidiavo i vetunedi tosakona i na vematavulogidi we'e egavo yadi sauluva 'atumaidi i na subiadi. 15^bTomotoga fuerdi Yaubada wata Iesu Valana 'Atumaina i bavuyedi bega tutuya fuerdi i awavesakoyemi. Yaubada nuanuana 'wa na velvesauluva 'atumaina wata toveimea 'wa na vevematayakeyakedi bega toawavesakonidi yami sauluva i na 'isedi kebu 'adi fata wata i na vonavona 'waimie. 16^cYaubada 'akonadi i 'etoyavumi sauluva tuatuaidi 'waidiega, yavuyavumi 'wa na miamia, siwe kebu tamu yami sakona 'wa na velubwasabwasai yami sauluva 'ivauna 'wainega. We'e mogitana taunimi 'wa na tauyemi Yaubada 'waineye 'wa na vetofolova faifaina. 17Tomotoga matatabudi 'wa na veve'ililibuyedi, emiavo tovetumagana 'wa na nunuakalikaliedi, ma yami kololo Yaubada 'wa na vevematayakeyakeni, wata yami toveimea bwaikaotogina 'wa na ve'ililibuyeni.

Keliso yana tokemaiga vita 'waidie, yada 'eba 'isa.

18^dOmi 'ifwaimi 'wa vetofolovaga mali tomotoga 'waidie i lubwainemi 'wa na vevematayakeyakedi wata 'wa na veve'ililibuyedi. We'e tomotoganidi i nuakalikaliemiga wata i 'ivaisemiga kebu 'aise'avadi 'wa na veve'ililibuyedi, tomotoganidi yadi veimea fa'alidi 'waidiega vita 'wa veveluagadi wata 'wa na veve'ililibuyedi. 19^eAi'edi kebu tamu yami sakonaga vita 'wa na veluaga-maimaigidi, siwe Yaubada faifaina 'wa na nuanua bwaikina bega 'wa na totokemaigemi, taunina sauluva 'atumaina mataneye. 20^fSiwe 'ai'edi 'wa na tokemaigemi 'ainike 'waidie yami sakona faifaidi, tutulina ava'ai? We'e 'ai'edi yami sauluva 'atumaidi faifaidi i na nikemi bega 'wa na tokemaiga, Yaubada ma yana nuakalikali i na vesauluva 'atumaina 'waimie. 21^gI lubwainemi 'wa na tokemaiga vita 'waidie fai naninina faifaina Yaubada i venua'ivinem.

^y 2:11 Gal 5:16-17,24 ^z 2:12 Mad 5:16 ^a 2:13-17 Lom 13:1-7 ^b 2:15 1 Fit 3:15-17
^c 2:16-17 Gal 5:13 ^d 2:18-19 Efe 6:5-7 ^e 2:20 1 Fit 4:14 ^f 2:21 Mad 16:24

Keliso veviga i veluagadi faifaida yada 'eba 'isa, begaidi yana tokemaiga veviganidi 'waidie ta na vetutuyameni. ²²^gKebu tamu yana sakonaga wata kebu tamu tutuya 'awanega vekali i da souyen. ²³^hTomotoga i awavesakoyeniga, kebu wata awavesakoyega bonadi i da tutuli, tomotoga vita i veleveleni siwe kebu i da ve'isakololo 'waidie, yana nuanua matatabuna i yatoi Yaubada nimaneye, taunina yana veimea tonovina vonayavuga 'waineye. ²⁴ⁱKeliso 'aiseotogina yada sakona i 'ewadi tomogoneye 'ai lagalagana 'waineye i ve'a'avadi, bega 'ada fata sauluva sakoidi ta na vedumwe'ai'aledi 'wa da vo ta da wafa sauluvanidi 'waidiega. Tutuya de'e yada nuanua bwaikina ta na vevesauluva tonovina Yaubada mataneye. 'Ana kini'ona 'waidiega ta ve'atumai. ²⁵^jOmi basenadi 'wa mia 'ani'ie Yaubada 'wainega 'wa da vo bani'odi 'aisaya sifi i da vuyo, siwe 'asiau 'wa vilami 'ami To'isave'avina 'waineye, 'anu'anunumi i 'i'ita'ita'iedi Seitani yana toketokena 'wainega.

Naginagidi 'adi veimea.

3 ¹⁻²^kIesu taunina i tauyeni Tamana yana nuanua 'waineye, 'omi vevine wata bani'odi taunimi 'wa na tauyemi yami lalamogavo 'waidie 'wa na vevematayakeyakedi. 'Ai'edi yami lalamogavo 'ifwaidi kebu i da vetumaganaga Yaubada yana Vona 'waineye, yami vemamatayakayaka i na 'isedi, yadi 'eba 'isa bega i na nuaviladi Yaubada 'waineye. Kebu yami vona 'waidiega i na nuaviladiga, yami ve'ililibu wata yami sauluva tonovidi i na 'isedi bega i na vetumagana. ³^lKebu vaigavu nuami i na 'ewadi 'ami 'isa 'atumaidi faifaidi bani'odi nava'au-'amola, bida 'aninanamanamalidi, 'alo kaleko 'atumaidi 'adi tutula bwaikidi. ⁴We'e mogitana yami nuanua 'wa na 'ivivigavudi nuanua bikana wata nuaobu 'waidiega, naninidi kebu i na 'watu, 'adi 'isa 'atumaidi Yaubada mataneye. ⁵⁻⁶Basenadi vevine totafalolo, kumanidiavo yadi vetumagana i yato-vagasedi Yaubada 'waineye, de'e bani'odi i vigavuyedi. Yadi lalamogavo i vemamatayakeyakedi bani'odi Sela, Ebelamo i vemamatayakeyakeni wata i ve'ililibuyeni bani'odi 'adi toveimea. 'Ai'edi yadi sauluvanina 'wa na vetutuyameniga bega 'wa na vevesauluva 'atumaina wata kebu tamu nani faifaina 'wa na kolologa, 'omi Sela natudiavo mogitana.

^{7^m}Omi iavetami yami vevinevo taiadi 'wa miamianiga 'wa na nuani taunidi kebu toketokediga bega ma yami ve'ililibu 'wa na 'i'isave'avinidi fai taunidi ma fuemie 'ami nuakalikali mia 'atumaina wata miamia-vagaina 'wa na veluagai Tamami Yaubada 'wainega. Vona mogitana ma

^g 2:22 Ais 53:9 ^h 2:23 Ais 53:7; Lom 12:19 ⁱ 2:24 2 Kol 5:21; Ais 53:5-6

^j 2:25 Ion 10:11 ^k 3:1-2 Efe 5:22-24; 1 Kol 7:12-16; Tai 2:4-5 ^l 3:3-4 1 Tim 2:9-10

^m 3:7 Efe 5:25-30; Kol 3:19

yami ve'ililibu 'wa na 'i'isave'avinidi bega kebu tamu nani yami velu'ui i na veve'etobodedi.

**Matatabuda Tamada 'aitamogana, begaidi
ma edavo ta na vevenuakalikali.**

8 "Sai'afoga a na 'ailove bega de'e tamu nani faifaina a na veifufu fuemi 'waimie. Matatabumi Tamami 'aitamogana Yaubada, bega i lubwainemi ma emiavo 'wa na vevenuakalikali, yami nuanua 'aitamogana, 'ami vebae 'aitamogana 'ai'edi sosoana 'alo nuavita 'waidie, wata ma yami nuaobu ma emiavo 'wa na vevesauluva 'atumaina. 9 'Ai'edi tamu aitoi i na vesauluva sakoina 'waimie, kebu sauluva sakoinega 'wa na tutuli, wata i na yagaimiga kebu maniniega 'wa na tutuli. Kebu bani'odi 'wa na vesauluvedi we'e mogitana 'wa na velu'ui Yaubada 'waineye i na vesauluva 'atumaina 'waidie. Yaubada nuanuana bani'odi 'wa na vevesauluvedi bega yana nuakalikali i vona'awaufaufa 'awaie i na velemiga 'wa na veluagai. 10 °De'e vonanina nagami i voneyeni Yaubada yana Buki 'waineye i vo,

'Ai'edi aitoi nuanuana tutuya fuedi ma yana sosoana i na miamia,
Vona sakoidi wata vekali kebu i na sousouyedi 'awanega.

11 Sauluva sakoidi 'waidiega i na vedumwe'ubu'ubuta i na vevesauluva 'atumaina.

Ma yana tokemaiga i na vetafewa nuanua bikana wata veiana faifaidi.

12 I lubwaineneni bani'odi i na vesauluvedi fai egavo yadi sauluva tonovidi, Yaubada i 'ise'isedi wata i nuanuanidi,

Wata yadi velu'ui 'waidie bonadi i noganogaidi.

We'e tosakona i awamata'isedi ma yana nuasako."

Tutuya 'ifwaidi vita i na souyedi sauluva 'atumaina 'wainega.

13 p' 'Ai'edi tutuya fuedi nuanuami sauluva 'atumaidi 'wa na 'i'idewadi, kebu tamu aitoi vita i na velemi. 14 q' We'e 'ai'edi vita 'wa na veluagadiga yami sauluva 'atumaidi faifaidi, 'asa'aiana 'wa na sosoanamo fai bola Yaubada 'ami tutula i na velemi. Kebu vita faifaidi 'wa na venuafouviga 'alo tomotoga 'wa na kololoyedi. 15-16 r'Mogitana kebu 'wa na kololo, siwe Keliso 'wa na nuanuani bega 'wa na ve'ililibuyeni, taunina 'ami Toveimea. 'Wa na venua'ivina-'atumai bega 'ai'edi tamu aitoi i na velutoliemiga i na vo, Awale 'wa vetumagana Iesu 'waineye," 'ami fata ma yami 'aseta 'wa na veifufu 'waidie, siwe ma yami ve'ililibu bonami bikadiega 'wa na vonedi. 'Omi Keliso yana tomotoga i lubwainemi 'wa na vevesauluva 'atumaina bega 'ami vebae 'waidie 'wa na lulutonovi kebu 'wa da sakosakona. Egavo i yagayagaimi wata yami sauluvanidi

ⁿ 3:8-9 Lom 12:16-18; Mad 5:44; 1 Tes 5:15; Efe 4:32 ^o 3:10-12 Same 34:12-16

^p 3:13 Mad 10:28; Voa 16:7; Lom 13:3 ^q 3:14 Ibu 10:5-6 ^r 3:15-16 Kol 4:6; 1 Fit 2:15

i awavesakoyediga, i na 'isemi kebu tamu yami sakonaga nika i na bunumayaga. ¹⁷^sAi'edi vita 'wa na veluagaiga sauluva sakoina 'wainega, 'omi taunimi, we'e 'ai'edi Yaubada yana nuanua 'wainega vita 'wa na veluagaiga yami sauluva 'atumaidi faifaidi, i lubwaineni, nani 'atumaina.

18-19 ^tKeliso wata vita i veluagadi sauluva 'atumaina faifaina, i wafa faifaida. Tutuya matatabuna faifaina, i wafa-vetamogai, yada sakona faifaidi. Taunina to'atumaina yana sauluva magemagetadi siwe i wafa 'ida tosakona faifaida bega i na vagavaida i na naweda Yaubada 'waineye. Tomogo'avana i luvewafai we'e 'Anu'anununa i vetoketoke bega i nago i lu'ivona towafa yaluadi 'waidie, kumanidiavo yogoyogonidi Vatu'ai Manamanawena 'waineye. ²⁰^wTowafanidi basenadiotoga Noa yana tutuye kebu nuanuadi Yaubada 'waineye i na vemamatayakayaka. Tutuya manamanawena Yaubada i tokemaiga nuanuana i na nuaviladi siwe tutuyanina Noa yana waka i yogona'a'avai i veimea 'wei bwaikina i obu. Tomotoga kebu fuediga i ve'atumai wakeye, matatabudi 8, ufa i ulalakasedi bega 'wainega i ve'atumai. ²¹⁻²²^xUfanina yada 'eba 'isa bafitaiso faifaina, 'wainega 'asiau 'ita'ita'i ta veveluagai. 'Ita'ita'inina bafitaiso 'wainega kebu yokeotoga 'ana 'ileko faifaina, we'e mogitana ta bafitaiso ta vona'awaufaufa Yaubada 'waineye ta nuavilada sakona 'waidiega. 'Ita'ita'i ta veluagai bafitaiso 'wainega fai Iesu Keliso i tovoi wafayega, we'e 'asiau i miamia abame, Yaubada veimea i veleni bega i miabui 'ana 'atagiega, anelose, toveimea, wata nani toketokedi matatabudi abame i veveimeyed.

Yaubada yana nuanua ta na vemamatayakeyakedi.

4 ¹^w'Wa na nuani tutuyanina Keliso i vetomotogaotoga taunina i tauyeni vita i veluagadi begaidi i lubwainemi yana nuanuanina 'wainega taunimi 'wa na kiavetoketokemi. Taunimi 'wa na tauyemi vita 'waidie, fai 'ai'edi aitoi mogitana taunina i tauyeniga Keliso 'waineye bega vita i na veluagadi faifaina, kebu nuanuana i na sakosakona. ²^xBegaidi tutuya de'e i na nagoga wafa 'ana 'etowava i lubwainemi bunu 'ana nuanua sakoidi kebu nuami i na 'ewadi, Yaubada yana nuanua 'aisena 'wa na vevematayakeyakedi. ³^yYaubada 'ana tobavu nuanuadi sakona-vebogi 'omi wata basenadi bani'odi 'wa vesaulivedi, siwe 'akonadi 'wa 'ailove 'asa'aiana 'ami fata 'wa na 'ailove-vagata. Basenadi yami nuanua matatabuna 'wa tauyedi sauluva 'eba bunumayaga wata bunu 'ana nuanua sakoidi 'waidie, ufa toketokena 'wa toke 'wa yemu nuami i lugaugaudi, 'wa ve'avula-avovo, wata ma yami subia 'wa 'odu'odu yaubada-vekavekali 'waidie.

^s 3:17 1 Fit 2:20 ^t 3:19 Efe 4:9-10; Fil 2:9-10 ^u 3:20 Nag 7:7 ^v 3:21-22 Lom 6:4;
Tai 3:4-5; Ion 3:5; Efe 1:20-21 ^w 4:1 2 Kol 5:15 ^x 4:2 1 Ion 2:16-17 ^y 4:3 Efe 2:2-3;
Tai 3:3

⁴Sauluvanidi 'akonadi 'wa bailedi bega emiavo kebu i da vetumagana Yaubada 'waineye nuadi i voganidi fai kebu 'wa da luluve'auyedi sakonanidi 'waidie, begaidi ma yadi nuasako i sisidibidi biemi. ⁵Tosakonanidi 'awaia tomotoga ma yawaidi wata wafawafadi taiadi i na vonayavuga Yaubada mataneye, bei i na veimea 'adi vematavuloga i na veluagai. ^{6^a}Mogitana tomotoga matatabuda ta na vonayavuga Yaubada mataneye, faifainanina basenadi Iesu Valana 'Atumaina i lu'ageyen'i tomotoga 'akonadi i wafaga 'waidie. Yaubada i na veimea tomotoga vematavuloga i na veluagai yadi sakona fwayefwayeye faifaidi, siwe Valanina 'Atumaina 'wainega 'anu'anunudi 'adi fata i na miamia Yaubada i miamiaga bani'odi.

Yaubada yana nuakalikali 'waideye, 'waidiega ta na 'aivaita.

^{7^a}Fwayafwaya wata nani matatabudi sai'afoga i na 'a'ava, begaidi taunimi 'wa na 'l'isave'avini mi, kebu 'wa na mia-maimaiga 'wa na 'isa'isa bega 'ami fata 'wa na vevelu'ui. ⁸Siwe tamu nani bwaikina 'wa na 'i'idewaiga, ma emiavo 'wa na vevenuakalikali mogitana bega kebu emiavo yadi sakona fuedi faifaidi 'wa na nuanua, 'wa na veveianamo. ⁹Emiavo 'wa na tauyedi i na luku yami vanuge mia wata 'eno faifaidi, kebu ma yami luvulewa 'wa na mia'ubu'ubusedi. ^{10^b}'Ida 'aitamogana 'aitamogana 'akonadi Yaubada yana nuakalikali tulina tulina 'ada veuveuta i veleda. 'Ada veuveutanidi ta na folovedi, 'waidiega edavo ta na 'l'ivaised i nika 'ida Yaubada yana tofolova 'atumaida. ¹¹'Aitamogana 'aitamogana 'akonadi ma 'ada veuveuta begaidi 'ai'edi aitoi i na lau'agega, i lubwaineni bonana 'ana nogaya mogitana Yaubada yana Vona. 'Ai'edi aitoi i vetofolovaga emiavo 'waidie, i lubwaineni Yaubada yana toketokena 'wainega i na folofolova. 'Ai'edi bani'odi 'wa na folovediga Iesu Keliso faifaina nani matatabudi 'waidie, tomotoga i na 'isedi Yaubada i na subiai. Taunina ma yana 'ai'aiwabu magemagetadi wata ma yana toketokena tutuya matatabuna 'waidie, kebu i na 'a'ava, i na 'eno-vagata. Vona mogitana, yaku nuanua 'asa'aiana bani'odi.

'Ida Keliso yana tomotoga vita ta na veluagadi faifaina.

¹²Ekwavo, vita 'akonadi 'wa veveluagadiga Keliso 'ana tovedumwe'ai'ai 'waidiega, faifaidi kebu nuami i na voganidi, i lubwaineni bani'odi ta na veveluagadi. ¹³Siwe 'wa na sososoanamo fai basenadi Keliso vita i veluagadi faifaida, 'asiau 'omi wata bani'odi 'wa veveluagadi faifaina, bega tutuyanina yana 'ai'aiwabu magemagetadi i na souyediga, bei 'wa na sosoana mogitana. ^{14^c}'Ai'edi tomotoga i na yagayagaimiga fai 'omi Keliso yana tomotoga, 'wa na sososoanamo, yami 'eba 'isa 'Anu'anunu Magemagetana, taunina Yaubada 'Anu'anununa, 'akonadi

^z 4:6 Lom 8:10 ^a 4:7-9 Lom 12:9-13 ^b 4:10-11 Lom 12:6-8; 1 Kol 12:4-7

^c 4:14 Mad 5:11; 4:14-16 1 Fit 2:19-20

i agemi. ¹⁵^a'Ai'edi 'omi 'wa na vavainago, 'wa na luluvewafaga, 'wa na totolive'edaga, 'alo tamu sauluva sakoina 'wa na 'i'idewaiga, faifaidi vematavuloga 'wa na veveluagadi, 'ana nogaya 'waikuye kebu 'atumaina. ¹⁶^dWe'e 'ai'edi vita 'wa na veluagadiga fai 'omi Keliso yana tomotoga, kebu faifaidi 'wa na bunumayaga, siwe 'wa na vekaiwamo Yaubada 'waineye fai 'ami 'eba 'ainana i na vo, Keliso yana tomotoga."

¹⁷Yaubada yana tutuya 'akonadi i velilivana, tomotoga matatabuda ta na vonayavuga mataneye i na veimeyeda vematavuloga faifaina. 'Ida Yaubada yana tomotoga, siwe ta na kumeta ta na vonayavuga mataneye, we'e tutuyanina tomotoganidi Yaubada yana Vona i vedumwe'ai'ailediga i na vonayavuga, mogitana vematavuloga bwaikina i na veluagai. ¹⁸^eTo'atumaina yadi luku abame kebu safailinaga, we'e tosakona wata Yaubada 'ana tovedumwe'ai'ai ava'ai i na souyen'i waidie? ¹⁹Mogitana to'atumaina yada luku abame kebu safailinaga begaidi egavo Yaubada i tauyedi bega vita i veveluagadi, i lubwainedi vitanidi 'waidie i na tokemaiga, i na vevesauluva 'atumaina wata taunidi i na tauyedi mogitana 'adi To'idewedewa 'waineye, kebu tamu sai'af o i na bailedi i na 'i'isave'avinidi.

Yaubada yana tomotoga 'adi 'isave'avina faifaina.

5 ¹'Omi 'au'auveavo, tovetumagana 'adi to'edakumetavo a na veifufu 'waimie. Yau wata bani'odi to'edakumeta, Keliso yana veviga matatabuna a 'isedi wata tutuyanina yana 'ai'aiwabu magemagetana i na sivemageseniga yau wata i na veleku. ²^fA na velu'ase'asemi nuanuaku Yaubada yana tomotoga 'wa na 'i'isave'avinidi bani'odi 'aisaya sifi 'adi to'isave'avinavo i 'i'ita'ita'iedi wata i 'e'edakumesedi 'atumaina. Yaubada yana tomotoga i 'anivelenedi 'waimie bega 'wa na 'i'isave'avinidi, ma yami dumwebika 'wa na veve'isabodedi Yaubada yana nuanua bani'odi, kebu 'wa na 'abiawa. Taunimi 'wa na tauyemi mogitana 'wa na vetofolova faifaidi, kebu tutula faifaina 'wa na nuanua. ³^gTomotoganidi i velemiga kebu 'wa na veveimeyedi veimea fa'alidi 'waidiega, yami sauluva 'atumaidi 'waidiega 'wa na 'e'edakumesedi, yadi 'eba 'isa. ⁴Bega tutuyanina Iesu, taunina yami to'edakumeta bwaikina i na souyen'i ami tutula i na velemi, tutulanina 'ai'aiwabu magemagetana i na 'eno-vagata 'waimie.

Tovetumaganavo i lubwainedi ma yadi nuaobu i na tovoi fa'alina.

⁵^hWe'e 'omi tubuvauvau iavetami, wata bani'odi ma yami ve'ililibu tulaidi 'wa na vevematayakeyakedi. Matatabumi ma emiavo 'wa na veve'ivaivaita ma yami nuaobu fai Yaubada yana Buki i vo,

^d 4:16 Fol 5:41 ^e 4:18 Voa 11:31 ^f 5:2 Fol 20:28 ^g 5:3 Fil 1:14; 1 Tim 4:12, 5:1;
Ion 13:14-15 ^h 5:5 Voa 3:34; Luk 22:26

Taunidi i awa'ai'aidiga Yaubada i vegaviedi,

We'e tonuaobu ma yana nuakalikali i vevesauluva 'atumaina 'waidie."

⁶ ⁱBegaidi ma yami nuaobu taunimi 'wa na tauyemi Yaubada yana toketokena 'waineye, bega tutuyanina nuanuana, i na kialakaimi veimea i na velemi. ^{7j}Ami vita faifaidi 'wa vevenuafouvig, matatabudi 'wa na 'avalavedamanidi 'waineye fai i 'l'isantuakalikaliemi.

^{8 k}Wa na 'isa'isa wata taunimi 'wa na 'il'isave'avinimi fai 'ada gavia Seitani i yabayaba nuanuana vita i na veleveleda wata yada vetumagana i na 'ivemweadi 'wa da vo bani'odi wayo'o i da bodaboda nuanuana 'aisaya tamu i na ovai. ^{9 l}Ma yami vetumagana 'wa na tovotovoi fa'alina wata Seitani 'wa na veugeugen fai 'akonadi 'wa 'asetai emiavo tovetumagana 'awalawa matatabuna 'waidie vita i veveluagadi, 'omi wata bani'odi vitanidi 'wa veveluagadi. ^{10 m}Vitanidi 'wa veveluagadiga siwe kebu tutuya manamanawenaga wata i na 'alava fai Yaubada tauniotogina i na 'ive'atumaimi, i na kiavefa'alimi wata i na kiavetoketokemi bega 'wa na mia 'atumaina. Yaubadanina yana sauluva matatabuna nuakalikali, i venua'ivinemi bega 'wa na luku yana 'ai'aiwabu miamia-vagaina 'waineye Keliso taiadi 'wa na miave'itubama. ¹¹Yana toketokena nani matatabuna 'waidie kebu i na 'al'avaga i na 'eno-vagata. Vona mogitana, yaku nuanua bani'odi.

Fita yana vona 'ana 'eba ve'a'ava.

^{12 n}Yami leta de'e siaina Sailasa i 'ivaiseku 'a kilumi, taunina iaku tovetumagana yana sauluva matatabuna a 'asetadi ma 'ana vetumagana. Yaubada yana nuakalikali mogitana 'akonadi a lu'ivona leta de'e nageneye, bega nuanuaku 'wa na tovotovoi fa'alina yana nuakalikalinina 'waineye.

^{13 o}Emiavo Keliso 'ana tovetumagana 'omi ma fuemie Yaubada i venua'ivinediga, side bei 'atamana Loma^p 'waineye yadi vekaiwa i vetunei 'waimie, wata Malika, kumanina a aware-natuna 'waineye.

¹⁴Emiavo tovetumagana 'wa na veluagadiga, ma yami nuakalikali 'wa na 'avalamaigidi.

A vevelu'ui faifaimi, nuanuaku 'omi wata 'ifwaidi edavo Keliso taiadi 'wa miave'itubamaga, Yaubada nuanua bikana mia 'atumaina taiadi i na veleveledi.

'Asa'aiana bani'odi.

Yau Fita.

ⁱ 5:6 Fil 2:8-9 ^j 5:7 Mad 6:25-26 ^k 5:8-10 2 Tim 4:17-18; Lom 8:18 ^l 5:9 Efe 6:11-13;

Iem 4:7 ^m 5:10 1 Tes 5:23-24 ⁿ 5:12 Fol 15:22 ^o 5:13 2 Tim 4:11; Lom 1:7

^p 5:13 'Ana mogitana 'atamana Babiloni, siwe tamu 'ana wagava.